

**Permohonan Visa Kemasukan Pelbagai Lima Tahun Bagi Pelabur Dibuka Pada Disember, Kata Najib Bernama
August 26, 2014**

KUALA LUMPUR, 26 Ogos (Bernama) -- Dalam usaha untuk memudahkan pergerakan modal insan dengan pelaksanaan Komuniti Ekonomi Asean tahun depan, Malaysia, akan membuka permohonan Visa Kemasukan Pelbagai bagi lima tahun bagi pelabur pada Disember ini.

Semasa mengumumkannya hari ini, Perdana Menteri Datuk Seri Najib Tun Razak berkata permohonan berkenaan boleh dibuat di Bahagian Perkhidmatan Pegawai Dagang Jabatan Imigresen, yang dilancarkan pada Jun.

Najib berkata langkah itu diambil untuk menyokong pergerakan pelawat perniagaan, pelabur dan pengurus dana, termasuk dari luar Asean seperti India dan China.

"Pergerakan yang lebih bebas bagi pelawat perniagaan, pelabur dan profesional mahir merupakan perkara penting untuk menyokong perdagangan dan pelaburan," kata Najib dalam ucapan pada Sesi Dialog Pemimpin Perniagaan hari ini.

Beliau berkata memandangkan Malaysia akan menjadi pengerusi Asean pada 2015, adalah penting bagi Malaysia membuat persediaan penting ini dalam integrasi Asean yang menyediakan peluang yang lebih luas bagi Malaysia.

Najib juga berkata bagi memastikan peluang dalam Asean mencapai semua peringkat komuniti termasuk golongan muda, Malaysia akan melancarkan Program Latihan Asean, program "My Asean Internship".

Melalui program ini, syarikat-syarikat Malaysia akan membawa belia Malaysia untuk latihan di luar negara dan negara-negara Asean dan belia dari negara-negara Asean menjalani latihan di Malaysia.

"Pada masa ini, kesedaran tentang peluang yang muncul daripada AEC masih rendah, walaupun dalam kalangan usahawan akan datang," kata beliau.

Majikan-majikan utama yang bersetuju untuk merintis inisiatif ini termasuk CIMB, Malayan Banking Bhd, Axiata dan Sime Darby Bhd.

Dialog Pemimpin Perniagaan itu dihadiri 40 pemimpin korporat yang mewakili syarikat awam tersenarai dan syarikat berkaitan kerejaan.

Hadir sama Menteri-menteri di Jabatan Perdana Menteri Datuk Seri Abdul Wahid Omar dan Datuk Seri Idris Jala serta Menteri Pendidikan Kedua Datuk Seri Idris Jusoh.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1063570>